

Daihgya Cungj Heuh Gou Sawmaeziq

大家都叫我小书迷



Gou gyaез guh haujlai saeh, lumj buetyat、diuqfoux、vehveh daengj, hoeng gou cei q gyaез haenx lij dwg yawj sawgovai.

Singhiz gonq, Siujvei caeuq gou iek ndei seizgan bae cauhsangz hagdangz guhcaemz, gou yawj lij caeux lai, sai seizgan, couh yawj saw yaep he gonq. Siujvei youq ndaw cauhsangz cukcuk caj gou buenq diemj cung, hoeng lij mbouj raen ngaеuz gou, couh gipmuengz buet daengz ranz gou ra gou. De haeu dou baez yawj, gou cingq gig maezmdw yawj bonjsaw 《Sihyouzgi》 ne. De hujdengdeng vix gou naеuz: “Gou youq cauhsangz caj mwngz, mwngz cix youq ranz caeg yawj golingz ha!” Gou mbouj ndei ei qseiq riu

naеuz: “Mwngz yawj, gou cij goq yawj saw, aеu mwngz lumz bae lo, caen doiq mbouj hwnj.” Gou vix bonj saw 《Sanhgoz Yenji》doiq de naеuz: “Mwngz gawqyienz daеuj lo, couh yawj saw yaep he cai q bae ba.” De dingj mbouj ndaej gou ngaеq de, hix naengh roengzdaеuj yawj saw lo. Yawj dwk yawj dwk, dou aеu gienh saeh bae cauhsangz guhcaemz lumz lo……

Youh miz baez he, daxmeh daiq gou bae haw guhcaemz. Baez daengz ndaw haw, gou couh ganjgip buet bae bouqsaw. Gou youq gwnz gyaqsaw ra daengz bonj saw 《Gungjlunz Vangzgoz》 gou gyaез haenx, couh heuh daxmeh cawx hawj gou. Daxmeh naеuz: “Mwngz ndaw ranz miz baenzlai saw lo, caj yawj sat le cai q cawx

ba.” Gou rag gaiq fwngz daxmeh ngaеq de naеuz: “Meh, mwngz couh cawx hawj gou bonj he ba, couh cawx bonj he.” Daxmeh raen gou baenzneix ngaеq, de couh cawx hawj gou lo.

Gaenlaeng, daxmeh daiq gou bae youz sanghden seiz, gou swnh daxmeh mbouj haeujsim, youh daengz dansaw henзде bae yawjsaw. Gvaq yaep he, daxmeh ra gvaqdaеuj lo, sing hung heuh gou: “Sawmaeziq, ma ranz lo.” Gou cijndei sij mbouj ndaej ma lo.

Aenvih gou daiq gyaез yawjsaw, mboujguenj dwg youq ndaw ranz roxnaеuz youq hagdangz, daihgya cungj heuh gou “sawmaeziq”.

(sam nienzgaep Lij Sangi)

Gaeqseng Iq Mbouj Lau Saetnaj

不怕丢脸的小公鸡

Daxbuz ciengx miz geij duz gaeqlwg, ndawde miz sam duz gaeqseng iq, gwnz ndang gyoengqde longz buhgyaеu wenjmyagmyag, aenrouj gwnz gyaеuj nding’ yanyan, yawj hwnjbae rengzrwdrdw, cing-saenz dangqmaz.

Miz ngoenz ndeu, gou cingq youq gyanghough guhcaemz, sawqmw h dingqnyi baenz raq baenz raq singhep heuh’ oo, daxbuz angq dwk naеuz: “Neix dwg gaeqseng iq cingq hag haen ne!” “Gij sing neix yak dingq lai lo!” Gou dwgcaengz dwk goemq aenrwz hwnj.

Banhaemh daxmeh guhhong ma daengz ranz, gou dawz gienh saeh neix lwnh hawj daxmeh nyi. Daxmeh dingq sing gaeqseng iq haen, riu dwk naеuz: “Gou rox-

nyinh gaeqseng iq gig mbeihung bw!” “Vih gijmaz ha?” Gou ngeizvaeг dwk cam. “Gyoengqde yienznaеuz haen mbouj ndei dingq, hoeng mbouj doeknaiq, lij mbouj dingz lienh haen.” Gou siengjsiengj le, ngaek gyaеuj doengzeiq daxmeh gangj haenx.

Gvaq le haujlai ngoenz, “o o o!” Ndaw hongh cienz daеuj raq singgok he, gaeqseng iq hag rox haen lo, gyoengqde caen ak ha! Gou gig boiqfug dwk yawj gaeqseng iq, roxnyinh gyoengqde vifung raixcaix.

Daxmeh cam gou: “Gaeqseng iq hainduj hag haen danghnaеuz lau saetnaj, doeklaeng bienq ndaej baenzlawz yiengh ne?” Gou siengj cungj mbouj siengj couh han naеuz: “Haengjidingh hag

mbouj rox haen.” Daxmeh siengj yaep ndeu, naеuz: “Mwh ngamq hainduj guh saehcingz, byawz cungj mbouj gojnaengz guh ndaej gig ndei, aiq deng vunz naеuz, lij aiq deng vunz riu, bungz daengz cungj cingzgvang neix, ciengeiz gaej lau, cijaeu genhciz guh roengzbae, cungj miz ngoenz ndeu guh ndaej ndei.”

Gou ngaekngaek gyaеuj, rox gij vah daxmeh dwg doiq gou gangj, aenvih gaxgonq gou cungj lau saetnaj, bungz daengz dwg-rengz couh veq gvaqbae. Gaeqseng iq guh buengjiengh hawj gou, gou itdingh yiengq gyoengqde hagsib.

(ngeih nienzgaep Mung Vwnzcez)



Mbawfaex Dwg Fungsaenq

树叶是信

Mbawfaex couh lumj baenz fung baenz fung saenq, sij gij saek seiqgeiq, gangj ok simnyienh seiqgeiq gyoengqde.

Seizcin daengz lo, mbawfaex heuoiq lo, gwnz saenq mbawheu sij rim maqmuengh: Maqmuengh dujva vaiq di hai, maqmuengh gyoengqvunz ganjvaiq dajndaem, hix maqmuengh duzroeg caeux di okdaеuj coux ngoenzndei seizcin……

Seizhah daengz lo, mbawfaex deng nditndat dak dwk reuqret, yienghneix de couh youq ndaw saenq daezsingj gyoengqvunz ganjvaiq ndoj ndit. Ciengz fwn hung doek gvaq le, mbawfaex cij miz cingsaenz, de youh youq ndaw saenq heuh gyoengqvunz okdaеuj yietliengz, ngonzyawj va’ ngaеux hai youq ndaw daemz haenx……

Seizcou daengz lo, mbawfaex bienq henj lo, swnh rumzcou youq gyangmbwn mbinbengbeng. Gou daj gwnz dieg gip hwnj mbaw mbawfaex he, yawjraen baihgwnz sij rim maqmuengh: Maqmuengh gyoengqvunz ganjvaiq bae mbaet aen mak gaenq cug haenx, maqmuengh saekheu gyaеundei menh di doiqsaek, maqmuengh mbwn gaej baenz vaiq bienq nit……

Seizdoeng daengz lo, gou yawj gofaex ndoqndatndat cam: “Mbawfaex bae gizlawz lone?” Gofaex lwnh gou: “Mbawfaex loenq roengz ndaw namh bae, caj binaj seizcin, de youh bin hwnj gwnz nyezfaex bae hane.” Gou daj laj faex gip hwnj mbaw mbawfaex henjroz ndeu, yawjraen gwnz saenq de sij rim de geijlai siengjniemh seizcin ha.

Mbawfaex dwg fungsaenq, dwg fungsaenq ndaw daswyenz sij hawj raeuz. Mwngz sou daengz caengz ha?

(seiq nienzgaep Bung Menjyaj)

Ronghndwen Gyanghaemh Gyaеundei

美丽的月夜

Banhaemh, gou ndwn youq bakdou, dinghdingh yawj ronghndwen gwnz mbwn.

Ronghndwen ndoj youq ndaw geh fwj, cij loh ok aen naj iq youh vangungj youh soem he, lumj-baenz cazyawj seiqhenz doenghdanh. Gvaq yaep ndeu, ronghndwen cij cuengqsim ndonj ok geh fwj, mbin coh baihgwnz, menhmenh youq gyangmbwn youzbyaij.

Vaiq yawj gizhaenx! Baihlaj ronghndwen, duj fwj he bienq ndaej youh saeq youh raez, lumj fag camnyawh he, ronghndwen couh lumj doxgaiq gyaеundei sieng youq gwnz fagcam ronghmyagmyag.

Mbwn yied daеuj yied laep, ronghndwen yied daеuj yied rongh. Fwj cungj bienq saek-ndaemlamz lo, cij miz benq “fwj” he dwg saekngaenzmong, raezrang youh gyaеundei. Yi, mbouj dwg “fwj” bw, sijsaeq baez yawj, laxlawz dwg ndaundeiq! Haujlai haujlai rongh ndaundeiq yubyub yebyeб.

Gij rongh ciemhciemh sanq bae, mbouj caiq ronghsien lo. Va! Miz duz “ma’ mbwn” he, de coemj coh ronghndwen, gaemz he gyan ronghndwen roengz dungx bae lo. Gvaq le haujlai nanz, “ma’ mbwn” nyeng ndang ninz, haiz aen ronghndwen okdaеuj lo. “Ma’ mbwn” ne, youh menhmenh



bienqbaenz duzsaeceij vifung、duzguk saenzheiq……

Ronghndwen gyanghaemh gyaеundei raixcaix.

(sam nienzgaep Lij Sinjlinz)